

錄

續東文選

第十一

第十一

續東文選卷之二十一

錄

頭流記行錄

金宗直

某生長嶺南頭流乃吾鄉之山也而遊宦南北塵埃汨沒年齒已四十尚不得一遊焉辛卯春持左符于咸陽頭流在其封內鬼然蒼翠舉眼斯得而凶年民事簿書倥傯殆二期又不敢一遊焉每與俞克己林貞叔語此未嘗不介介于懷今年夏曹大虛自關東來從余讀禮及秋將返于庭闈而求遊茲山余亦念羸瘵日增脚力益衰今年不遊則明

年難卜况時方仲秋露凝已霽三五之夜翫月於
天王峯鷄鳴觀日出明朝又周覽四方可一舉而
無得遂決策遊焉乃邀克己共大虛按壽親書所
云遊山具稍增損其所賫十四日戊寅德峯寺僧
解空來使為鄉導韓百源請從遂歷嚴川憇于花
巖僧法宗尾至問其所歷阻折頗詳亦令導行至
地藏寺路歧舍馬著芒鞋策杖而登林壑幽窅已
覺勝絕一里許有巖曰歡喜臺大虛百源上其巔
其下千仞俯見金臺紅蓮白蓮諸刹訪先坦菴菴
負峭壁而構二泉在壁底極冽墻外水自半巖缺

泐津溜而落盤石承之稍坳處滢然渟滃其罅生
赤楊龍湫草皆數寸傍有磴路繫藤蔓一條于樹
攀之上下以往來于妙貞及地藏宗云有一比丘
結夏孟蘭罷後雲遊不知所向種小瓜及蘿菹於
石上有小砧杵糠粃數升許而已訪新沍無僧亦
負峭壁菴東北有巖曰獨女五條離立高皆千餘
尺宗云聞有一婦人累石巖間獨棲其中鍊道冲
空故為號云以累石猶存栢生巖腰欲上者梯木
挽其栢迴繞巖闕背腹俱盪磨然後達其頂然不
能辦命者不能上從吏王崑聳山能上而超足麾

手予嘗往來山陰望見是巖與諸峯角出若柱天
然今而身跨茲地毛骨慄然恍疑非我也稍西迤
抵古澗菴日已曛矣議論臺在其西岡克已等後
余獨倚杖于三盤石香爐峯彌陀峯皆在脚底空
云崖下有石窟老宿優陀居之嘗與三澗僧居此
石論大小乘頓悟仍以為號少選寮主僧荷衲來
合掌云聞使君來遊何在空目僧休說僧面稍赤
余用蒙莊語慰藉云我欲煬者爭竈舍者爭席今
寮主見一野翁耳豈知某為使君空等皆笑是日
余初試險步幾二十里極勞憊熟睡夜半而覺月

色吞吐諸峯雲氣騰湧余默慮焉已卯黎明益陰
翳寮主云貧道久住此山以雲卜之今日必雨
余喜減擔夫遣還出寺即行蒼藤深菁中大木之
自斃者顛仆于谿徑因為略約其半朽者枝條猶
拒地若行馬然挽出其下度一岡空云此九隴之
第一也連度三四得一洞府寬閑奧邃樹木蔽日
蘿薜蒙絡溪流觸石曲折有聲其東山之脊也而
不甚峭峻其西地勢漸下行二十里達于義谷村
也若携鵝犬牛犢以入刊木墾田以種黍稌麻菽
則武陵桃源亦不多讓也余以杖叩澗石顧謂克

已曰嗟乎安得與君結契隱遁盤旋於此耶使之
刮苔蘚題名于巖腹度九隴訖便由山脊而行行
雲伍拂簣子草樹不雨而灝始覺去天不遠也不
數里循脊南乃晉州之地也煙霧瀰漫不能眺望
抵清伊堂以板為屋四人各占堂前溪石上小憩
自此至永郎岵道極懸危正如封禪儀記所謂後
人見前人履底前人見後人頂攀挽樹根始能下
上日已過午始登岵自咸陽望此峯最為峻絕到
此則更仰視天王峯也永郎者新羅花郎之魁領
三千徒遨遊山水嘗登此峯故以名焉少年臺在

峯側蒼壁萬尋所謂少年豈永郎之徒歟余抱石
角下窺若將墜也戒從者勿近傍側時雲霧消散
日脚下垂山之東西豁谷開豁望之無雜樹皆杉
檜松栴槁死骨立者居三之一往往間以丹楓正
如圖畫其在岡脊者困於風霧枝幹皆左靡拳曲
雲髮飄颻云海松尤多土人每秋採之以充貢額
今歲無一樹帶殼苟取盈則吾民柰何守令適見
之是則幸也有草類書帶柔韌而滑可藉以坐卧
在在皆然清伊以下多五味子林密而到此無之
只見獨活當歸而已歷嶰踰嶺傍有船巖宗云上

古海水懷襄時船繫于茲巖而螭蟬過之故名余
笑曰信汝之言其時生類盡攀天而活邪又並脊
南登中峯山中凡隆起為峯者皆石獨此峯戴土
而端重可以布武焉稍下步憩焉巖有泉清冽可
飲值歲旱使人登此巖蹈躡便旋則必致雷雨余
前年及今夏遣試之頗驗脯時乃登天王峯雲霧
翳勃山川皆闇中峯亦不見矣空宗先詣聖母廟
捧小佛呼睛以弄之余初以為戲問之云俗云如
是則天晴余冠帶盥洗捫石磴入廟以酒果告于
聖母曰某嘗慕宣尼登岱之觀韓子遊衡之志職

事羈纏願莫之就今者仲秋省稼南境仰止絕峯
精誠靡阻遂與進士韓仁孝俞好仁曹偉等共躡
雲梯來詣祠下屏翳為祟雲物鱗鱗遑遑悶悶恐
負良辰伏丐聖母歆此洞酌報以神功致令今日
之夕天宇廓然月色如晝明日之朝萬里洞然山
海自今則某等獲遂壯觀敢忘大賜酹已共坐神
位前酒數行而罷祠屋但三間巖川里人所改創
亦板屋下釘甚固不如是則為風所揭也有二僧
繪畫其壁所謂聖母乃石像而眉目髻鬟皆塗以
粉黛頂有缺畫問之云太祖捷引月之歲倭寇

登此峯斫之而去後人和黏復屬之東偏陷石壘
空等所弄佛在焉是號國師俗傳聖母之淫夫又
問聖母世謂之何神也曰釋迦之母摩耶夫人也
噫有是哉西竺與東震猶隔千百世界迦維國婦
人焉得為茲土之神余嘗讀李承休帝王韻記聖
母命詵師註云今智異天王乃指高麗太祖之妣
威肅王后也高麗人習聞仙桃聖母之說欲神其
君之系創為是談承休信之筆之韻記此亦不可
徵矧縉流妄誕幻惑之言乎且旣謂之摩耶而汚
蔑以國師其褻慢不敬孰甚焉此不可不辨日且

昏陰風甚顛東西橫吹勢若撥屋振嶽嵐霧全入
衣冠皆潤四人皆枕藉祠內寒氣徹骨更襲重綿
從者皆股戰失度令燒大木三四本以熨之夜深
月色黯黹喜而起視旋為頑雲所掩倚壘四瞰六
合瀕洞若大瀛海之中乘一小舟軒昂傾側將淪
于波濤也笑謂三子曰雖無退之之精誠知微之
道術幸與君輩共御氣母浮游混沌之元豈非躡
歟庚辰風雨猶怒先遣從者於香積寺具食令披
徑路來迎過午雨少止石砭滑甚使人扶携推轉
而下數里許有鐵鎖路甚危便穿石穴而出極力

步投香積無僧已二載澗水猶依割木潺湲而落
于槽窓牖關鎖及香槃佛油宛然俱在命淨掃焚
香入處之薄暮雲靄自天王峯倒吹其疾不容一
瞥遙望或有返照余舉手喜甚出門前盤石望薩
川蜿蜒而諸山及海島或全露或半露或頂露如
人在帳中而見其髻也仰視絕頂重巒疊嶂不知
昨日路何自也祠旁白旆南指而颺蓋繪畫僧報
我知其處也縱觀南北兩巖又待月出于時東方
未盡澄澈復寒凜不可支令燒楫拙以熏屋戶然
後就寢夜半星月皎然辛巳曉日升賜谷霞彩映

發左右皆以余困劇必不能再陟余念數日重陰
怨尔開霽天公之餉我多矣今在咫尺而不能勉
強則平生芥滯之宵終不能盪滌矣遂促晨餽蹇
裳徑往石門以上所履草木皆帶冰凌入聖母廟
復酌而謝曰今日天地清霽山川洞豁實賴神休
良深欣感乃與克已解空登北壘大虛已上板屋
矣雖鴻鵠之飛無出吾上時因新霽四無纖雲但
蒼然茫然不知所極余曰夫遐觀而不得其要領
則何異於樵夫之見盍先望北而次東次南次西
且也自近而遠可乎空頗能指示之是山自北而

馳至南原首起為般若峯東迤幾二百里至此峯

更峻拔北蟠而窮焉其四面支峯裔壑競秀爭流

雖巧曆不能究其數見其雉堞若曳而繚者咸陽

之城歟青黃膠戾而白虹橫貫者晉州之水歟青

螺點點庚而橫矗而立者南海巨澚之群島歟若

山陰丹谿雲峯求禮河東等縣皆隱於襍積之中

不得而視也山之在北而近曰黃石安法曰鷲巖咸陽

遠曰德裕咸陰曰雞龍公州曰走牛錦山曰修道禮知曰伽

倻星州東北而近曰皇山陰山曰紺嶽嘉遠曰八公大丘

曰清涼東安在東而近曰閑岬宜寧曰集賢惜州遠曰毗

瑟風玄曰雲門

清道

曰圓寂

梁山

東南而近曰卧龍

泗水

在

南而近曰瓶要

東河

曰白雲

光陽

西南而遠曰八顛

興陽

在

在西而近曰荒山

雲峯

遠曰無等

光州

曰邊山

扶安

曰錦

城

羅州

曰威鳳山

高

曰母岳

全州

曰月出

靈巖

西北而遠曰

聖壽

長水

或若培塿或若龍虎或若釘鉅或若劍鉞

而唯東之八公西之無等在諸山稍為穹隆也雞

立嶺以北縹氣漫空對馬島以南蜃氣接天眼界

已窮不復了了也使克己志其可識者如右遂相

顧自慶曰自古登此峯者有矣豈若吾曹今日之

快也下壘距磴而坐酌數盃日已亭午望靈神坐

高臺尚遠亟穿石門而下登中山亦主峯也郡人
由嚴川而上者以北第二峯為中自馬川而上者
旣峯為第一此為第二故亦稱中馬自是皆由山
脊而行其間奇峯以十數皆可登眺與上峯相埒
而無名稱克己曰自先生名之可矣余曰其如無
徵不信何林多馬價木可為杖使從者棟滑而直
者取之須臾盈一束歷旣峯抵沮汝原有楓樹當
徑屈曲狀棖蘭由之出者皆不俛僂原在山之脊
也而夷曠可五六里林藪蕃茂水泉縈迴可以耕
而食也見溪上草廠數間周以柴柵有土炕乃

廂捕鷹幕也余自永郎帖至此見岡巒處處設捕
鷹之具不可勝記秋氣未高時無採捕者鷹隼雲
漢間物也安知峻絕之地有執械豐蔀而伺者見
餌而貪猝為羅網所絙條鉞所制亦可以倣人矣
且夫進獻不過一二連而謀元戲玩使鷄衣啜殮
者日夜耐風雪跼伏於千仞峯頭有仁心者所不
忍也暮登唱佛臺巉巖斗絕其下無底其上無草
木但有躑躅數叢羚羊遺矢焉俯望豈原串麗水
串蟾津之委山海相重益為奇也空指衆壑之會
曰新興寺洞也李節度克均與湖南賊張永已戰

于此求已狗鼠也以負險故李公之智勇而不能
禁遏其奔迸卒為長興守之功可嘆已又指岳陽
縣之北曰青鶴寺洞也噫此古所謂神仙之區歟
其與人境不甚相遠李眉叟何以尋之而不得歟
無乃好事者慕其名構寺而識之歟又指其東曰
雙溪寺洞也崔孤雲嘗遊于此刻石在焉孤雲不
羈人也負氣槩遭世亂非惟不偶於中國而又不
容於東土遂嘉遯物外溪山幽閒之地皆其所遊
歷世稱神仙無愧矣宿靈神寺但有一僧寺之北
崖有石如葉一軀世祖大王時每遣中使行香

其頃有缺亦云為倭所斫噫倭真殘寇哉屠剥生
人無餘聖母與迦葉之頭又被斷斬豈非錐頑然
之石以象人形而遭患歟其右肱有瘕似燃燒亦
云劫火所焚稍加焚則為彌勒世夫石痕本如是
而乃以荒怪之語誑愚民使邀來世利益者爭施
錢布誠可憎也迦葉殿之北峯有二巖突立所謂
坐高臺也其一下蟠上尖頭戴方石闊纔一尺浮
屠者言有能禮佛於其上得證果從者玉崑廬丁
能陟而拜子在寺望見亟遣人叱止之此輩頑愚
幾不辨菽麥而能自判命如此浮屠之能誑民舉

此可知法堂有蒙山畫幀其上有贊云頭陀第一
是為抖擻外已遠塵內已離垢得道居先入滅於
後雪衣雞山千秋不朽傍印清之小篆乃匪懈堂
之三絕也東砌下有靈溪西砌下有玉泉味極甘
以之煮茗則中冷惠山想不能過泉之西壞寺巋
然此古靈神也其西北斷峯有小塔石理細膩亦
為倭所倒後更累之以鐵貫其心失數層矣壬午
早起開戶見蟾潭潮漲久視之乃嵐氣平鋪也食
罷並寺之西北憩于嶺上望般若峯約六十餘里
而兩足盡重筋力已竭雖欲往觀不能強也徑由

直旨而下道益懸危攀樹根履石角數十餘里皆
此類也面東而仰視天王峯若咫尺矣竹梢或有
實皆爲人所採松之大者可百圍櫛立嵌巖皆平
日所未見旣下峻趾二壑之水所合其聲噴放振
搖林麓澄潭百尺遊魚戢戢余四人掬水漱齒沿
崖曳杖而行甚可樂也谷口有野廟僕人以馬先
候焉遂更衣乘馬抵實宅里父老數輩迎拜道左
云使君遊歷無恙敢賀余始喜百姓不以優游廢
事罪我也解空往君子寺法宗往妙貞寺大虛克
己百源往遊龍遊潭余則踰登龜岵徑還郡齋出

遊纔五日而頓覺腎次神觀寥廓蕭森雖妻孥吏
胥視我亦不似舊日矣嗚呼以頭流崇高雄勝在
中原之地必先嵩岱天子登封金泥玉牒之檢升
中于上帝不然則當比之武夷衡岳博雅如韓昌
黎朱晦菴蔡西山修煉如孫興公呂洞賓白玉蟾
聯裾接踵仿佯棲息於其中矣今獨為庸夫逃隸
竄藉學佛者之淵藪吾輩今日縱得登覽一遭僅
償平素之願而繩墨忿忿不敢訪青鶴歷五臺遍
探幽竒焉夫豈茲山之不遇耶長詠子美方丈三
韓之句自不覺神魂之飛越也歲壬辰仲秋越五

日書

遊松都錄

蔡壽

松京前朝所都也山水奇麗甲于東方五百年繁
華勝迹雖已掃地其遺風餘俗猶有存者嘗欲一
往探討而不得適仁川蔡耆之陽川許獻之夏山
曹大虛受暇讀書竹溪安子珍官亦閑昌寧成磬
叔將榮墳于坡州州距開城不遠遂相與約遊三
月十四日辛巳磬叔耆之子珍先發至長浦川邊
察訪宋逵張幕待之邀入設食飲數巡而罷暮投
留守別墅壬午耆之子珍凌晨先發至籍田磬叔上

墳致奠日晡隨至判官鄭希仁設酌魚鱉膾鯉杯
盤甚盛與希仁乘月而出馬上口占聯句入保定
門已聞鐘聲癸未周覽城中成如晦與弟世源亦
來從初到演福寺登層閣俯瞰都城閣西樹大碑
陽村所製而獨谷所書閣東懸大鐘稼亭所銘至
花園園已荒廢唯八角殿巋然獨存年久半摧殿
後裴石為假山花卉猶在高麗辛禠常在此園日
事沉酒而妄為攻遼之計及我太祖回軍圍園
數百重崔瑩不勝其憤殺門者而入當此時內外
離叛瑩以烏合市井之卒欲拒天人助順之師不

亦難哉至

穆清殿謁

御容殿即

太祖舊宅

也至成均館謁聖五聖十哲皆土塑元人所造也
過紫霞洞溪水潺湲奇花滿洞而多石砌古基示
知中和堂在何許也至王輪寺寺昔為大刹今獨
一殿在至水落石石在安和洞口清泉一派瀉出
崖竅其下成小泓小魚數百游泳其底相與濯足
出竿日晡到昭格殿洞口泉石甚清奇至本闕古
基基因松岳南麓厥勢甚高人言初創時不欲傷
地脉故累石為階高皆數十尺礎砌縱橫數里其
最據岡上者曰乾德殿殿門陞級儼然其下曰威

鳳樓其東麓石為隄者曰東池今為稻畦其南平
衍之地曰毬庭蒼松萬株蒼蔚攬天所謂山呼賞
春玉燭等亭皆不可尋相與吊古遐思感嘆不已
經歷林君秀卿携酒尋至登乾德殿古址飲于松
閒俗號滿月臺豐德訓導具繼重携琴來會日晚
將散大虛獻之自京而到留飲數盃而罷甲申暮
食至福靈寺佛殿有十六羅漢迺元人所塑精巧
無比遵天磨西麓迤北踰檜嶺路上不堪困弱下
馬坐溪曲樹陰扶疎寒流淨澈可愛啜水漬乾饌
而飲自此山蹊險巖攀緣而升人馬顛躓到村淵

洞口洞自昔蒙翳入不得入今皆芟荆遂成大路
淵在天磨聖居兩山之間兩山翠葦對峙攢如劍
戟望若畫圖山斷勢阻峭壁陡絕削立千仞上有
石潭鰭而為淵廣可數十尺狀如鐵鑊水色澄碧
其深不測而可鑑其底當心有石突起可坐數十
人潭水溢為瀑布落于絕壁宛若銀潢倒掛噴珠
散雪喧騰巖洞聲如怒霆可怖可愕不可殫說者
之嘆曰不知造物之至此也若未來觀真瓮中之
醢鷄耳緣崖有虬松倒垂從者猿附下窺髮豎魂
悸不可近石上多志遊人姓名諺傳昔有朴姓儒

吹笛淵上為龍女所誘入潭不返其妻號泣投崖而死故上曰朴淵下曰姑母潭高麗文宗嘗登石上龍振其石李靈幹以祝法鞭龍淵水盡赤此即潭心石也上數十步有石佛二軀坐巖竇東曰怛怛朴朴西曰弩膀夫得至觀音窟寺即我太祖潛邸時願刹而牧隱作記寺後有窟深廣中有石大士故名之谷中泉石奇絕而因日晚不得遍遊寺前有盤石可坐流水泓回而觸石有聲遂携酒酬酢其上燃松明寫聯句俄而東峰月上光輝散林壑照耀如晝大虛因於索句橫卧石上磬叔脫

巾露頂散步彷徨獻之抱膝沉吟若有所思如晦
持觴導飲不已世源不醉整衿而坐具公大醉撫
琴竒態橫發者之亦操數弄清雅可聽希仁不覺
前膝子珍亦醉取琴而彈頗不中節調具公曰兄
學藝若唯無恥則可成君之琴終大成矣一生絕
倒乙酉至雲居寺西室有達磨畫像宋孟珙作贊
而元至正閒所書也遂傍山而行至佛會寺洞口
經歷林君已來候矣坐柳陰臨流設酌獵雉兔網
小鮮劇飲而還暮過廣明寺寺乃高麗太祖故居
道說所謂種稌之地寺前有井入傳寵女所遊處

也丙戌朝雨乍晴俱輕裝短服出炭峴門至五冠
山洞口率崖環擁石泉瀦洄而躑躅倒影於水者
曰花潭行數十步有巖巖肩皴如襞積奇詭不可
狀者曰皺巖崔大尉雪中騎牛處也東峰有石浮
空獨立曰鼓岩至靈通寺寺在五冠山下洞府深
邃殿宇宏敞有古碣乃文宗子釋煦功德碑也金
富軾所製而吳彥侯所書寺前有土橋遺址高麗
時崇信術家言欲連地脉故跨澗築之也西偏有
樓累石為基溪流縈迴樹陰翳翳雖盛暑爽氣襲
人壁上有陽村真逸釋月窓等詩還至歸法寺前

溪寺乃光宗所創穆宗為康筆所逼奉太后執鞭而行出宿于此中葉以後文士聚儒生每校夏課賦詩唱必又辛禍携群妓來遊水中皆此地也寺廢已久壞瓦頽垣無復存者相與坐川邊石上戲作酒令罰籌交錯痛飲而還是日希仁具公不從丁亥陪留守相公觀獵于龍道坪臨流張幕午後合圍而下爭獻所獲狼籍於前暮還太平館經歷都事與察訪設宴以餞適有樂工數人自京而來皆一時妙手眾樂寥亮鏗匄響徹雲霄酒酣經歷出牋索詩甚苛各賦一篇以留戊子出承濟門行

二十餘里至敬天寺寺經火但存一室庭中有石塔光瑩如玉高十三層雕刻十二會相窮極精巧殆非人力所造寺乃元竒皇后願刹而塔亦中國人所作渡海來建于此當國步艱脆之日惑於內寵勞民力以事無用如此元祚之不長宜夫僧出所藏寶珠長幡以示之珠徑數寸光艷照人幡亦織金為之皆當時竒后所施者也又出脫脫丞相畫像半已脫落不可辨識至餅岳南有行宮古基即所謂長源亭岳西數里斷隴低枕海曲其上平衍晴莎淨綠有小峰斗絕控海曰堂頭舟人賽神

之所也碧瀾江自北南入于海曰禮成江漢水洛
河交流而西注于海曰祖江堂頭正據其衝近則
喬桐江華海上諸島戾橫出沒遠則延安海州之
境首陽諸山歷歷可數是日雲烟淡抹鏡面如拭
南北檣帆蔽海而來落日倒射金濤滉瀾眼界敞
豁一望無碍雖君山洞庭之壯觀想不能過也豐
德郡守宋叔琪與士諤來迓設食肴饌甚豐各傳
觴相勸引滿大醉及暝向豐德令人吹筚角前導
火城連亘數里已丑磬叔耆之子珍發遂京城獻
之大虛為主人所挽與士諤觀魚于大橋以事向

長湍壬辰還京首尾不滿十日而松京佳勝之地
足迹殆將遍焉意俱以繩墨之身而得為方外之
遊以償夙昔之願豈非吾儕之幸邪但以役於觀
覽而喪其所守則古人所戒吾儕之遊無已太康
邪因紀所歷且志吾輩之過以自勗耳

遊智異山錄

李陸

智異山又名頭流雄據嶺湖南二路之交高廣不
知其幾百里環山有一牧一府二郡五縣四附邑
其東曰晉州曰丹城其南曰昆陽曰河東曰蔭川
曰赤良曰花開曰岳陽其西曰南原曰求禮曰光

陽其北曰咸陽曰山陰上有峯之最高者二東曰
天王西曰般若相距百餘里常有雲氣蔽之自天
王稍下而西有香積寺又西五十里許有迦葉臺
臺之南有靈神寺西下二十餘里有虛曠之地平
衍肥腴縱橫皆可六七里往往下濕宜種穀有老
栢參天落葉沒脛中處而四顧無涯際宛然一平
野邈迤南下沿溪有義神新興雙溪三寺自義神
西折二十餘里有七佛寺自雙溪東踰一嶺有佛
日菴自餘名藍勝刹不可殫記而在山之絕頂者
香積等數寺皆覆木板無居僧唯靈神用陶瓦然

居僧亦不過一二以山勢絕峻不與村居相接自
非高禪鮮有安焉者有水源自靈神小泉至神輿
前則已為大川流入蟾津是謂花開洞川自天王
東下有千佛菴法戒寺自千佛小北而上有小窟
東臨大海西負天王絕有清致號巖法主窟又有
二水一自香積前一自法戒下至薩川合而為一
流入于召南津之下繞晉而東是謂菁川江召南
津者山北之水迤東而來至丹城縣又折而西自
薩川村行二十餘里有普菴寺其薩川村以內謂
之內山外謂之外山云自普菴直上急行一日有

半可到天王峯然崖石峻嶮無磳徑可尋又槐檜
蔽天下有細竹森密或有死木橫千仞之崖苔蘚
剥落又有飛泉遠自雲端衝冒其間下注不測進
不旋踵回不見後當斬數十木始可見尺天好事
者徃徃拾石塊置巖上以表路崖谷之間冰雪經
夏不消六月始霜七月始雪八月大冰合迨冬初
則雪甚谿壑皆平人不得徃來故居山秋而入至
明年春暮乃下或山下大雷電以雨而山上則清
明無一點雲蓋山高近天氣候自與平地頓異者
大抵為山下多柳栗樹稍上皆槐過槐盡杉檜叅

半枯死青白雜然相間望之如畫最上只有躑躅
木不滿尺凡佳蔬異果盛於他山近山數十官皆
食其利

遊松都錄

俞好仁

丙申秋上命揀文臣賜暇肄業于山房正郎蔡壽
耆之典籍許琛獻之直講權健叔強正字楊熙止
可行檢閱曹偉大虛洎僕俱被是選拜辭往棲于
藏義寺纔閱旬日始有負兒覆鼎之行歸且謀曰
松都王氏舊都真形勝之地流風餘俗猶想髣髴
盍往遊焉况吾儕過蒙上賜旌馳騫文字間無卯

申之縛時不可失約以明年春暮至期耆之輩同
磬叔耆輒先往予與可行適為職事所挽未遑也
浹辰之餘耆之等得詩百餘篇而還尤使人技癢
不禁也顧與可行云日者此輩收拾雖太苛豈盡
卷地來吾曹今且偷閑可償夙願不可坐受人訖
談時申從灌次韶與聞拍手笑曰是吾志也遂戒
行簾載史記兩漢書各一部兼叅酌遊山具四月
壬戌起程僧玄悅請從出敦義門踰沙峴至嘉論
川天其暑因卸鞍藉蒹渚俯瞰水紋如縠風至或
細細鱗起婢魚數隊闖然石下立命小奚施數罟

得什餘尾足供吾輩午廚也是日僕所騎款段屢
顛于中道強策之僅抵宿馬山驛村舍癸亥晨發
歷坡州黑雲滂渤涼籟瀏瀏雨勢起自紺岳過江
而西鱗甲笙鍾蕩搖百里間各具撥櫂而前先是
數月不雨千里龜折今日沾濡雖劇相與慶天公
不已有亭翼然渡頭登臨長嘯餘韻殷殷于林杪
過臨津行數十里屏翳猶未解幾不可當到普賢
院但數間廬宇獨存卑湫不可厯少西得村舍遲
霽乃行院前有小灘清淺可揭謗稱沉朝廷庚癸
之間武夫失意釀禍於然鬚蓄憤於溺殿至使輦

轂之下千戈蜂起而滿朝簪佩盡為魚腹之物尤
可慘哉是夕道途閒關有淖於前輒左右相違而
行入開城宿趙廉老家甲子早見經歷林斯文即
命衙吏掃空館安下焉遂刺謁留守成相公出與
房教授王精踰沙峴訪壽昌宮蓋成穆閒所建也
重樓複殿膠輶櫛比者已掃無餘只有鉤陳一面
而已今為府義倉螭階花礎埋沒草莽間老樹槎
牙如列戟烏鵲巢其頭西邊有蓮塘可數十畝翠
綃萬本交映鏡面蝦蟆數部閣閣甚可愴由十川
橋直抵演福寺中峙五層閣盡壓城闔眾愚觚稜

錯落彩霞真壯構也正西樹一碑陽村撰獨谷書
正東曰能仁殿有三大士軀住僧云此佛本在花
山賊耽專國時以舟移安焉更東一閣懸大鍾追
蓋甚古鍾面鏤記稼亭製也南詣景德即我太宗
舊邸也龍首山流峙為宮西小岡隆隆然若昂首
雄盤蓋神人所起基命之地祕而後出豈非天乎
乙丑質明拉房教授訪延慶宮舊址麗祖二年所
創也北據嵩山南控龍首洛河迤其東碧瀾哆其
西真天府也世傳其始惑術士之說不欲斷地脉
故隨岡勢為蜂房萬落雕藥鏤染結瑤構瓊者俱

已埋沒但見環數里間頽階敗砌縱橫高下萬松
攬天寒雲掩靄荆榛草露已為狐兔之鄉也舍馬
攀雲梯而上若鳳頸縮而欲飛者乾德殿基也面
勢敞豁正值其地諺稱滿月臺東偏曰東池今為
稻田肅睿之朝徃徃泛龍舸親試士史云高宗十
年水濁三日魚龍盡出可恠也池東曰義神倉距
殿西數十步曰簡儀臺俯見澗水自廣明洞逗殿
前石橋而下激激若環佩響橋南曰危鳳樓樓東
曰司諫院西岡腹數栢蒼秀者司憲府也府北墻
垣周遭者也皆遺址頽然樓南曰毬庭固

可數十步世云設八關飯僧之處若所云大觀觀
樂仁德之毀則不復了了由月臺僚康安殿而北
支徑如蛇細入林莽令僕夫披翳前導僅步得達
千廣明寺寺即世祖舊居也北階下有智井世云
龍女所浴處也距寺北有小丘若灸炷然俗稱溫
鞋陵語皆涉荒誕不可信寺前數十步有斷碑字
漫幾不可讀出永平門過普賢院傍天磨西址行
十餘里崎嶇穿歷一皆殘山斷隴所至路若窮而
稍復開豁抵清涼洞日已卓午暑霧熏潤腥風礙
塞少憩茂林下線流通其中可漱齒少選辛都事

尾至連鑣踰檜峴而迤北又一嶺當其前仰如壁
立去馬耆芒躋而登遙見天磨聖居兩山蒼翠挺
拔截入霄漢或若龍虎或若劍鋌從者叛而橫者
附爭竒露怪不可殫數入大興洞時日將夕輕靄
溟濛泓澗約數里兩山襟合狀若門關崖斷勢阻
成削萬仞上有龍湫曰朴澗因石為嵌竇若剖萬
斛窪尊溪水即焉黛蓄靄霽泓泓無底泓洄作勢
歟霍變化飛澇噴浪雷奔電吼瀉壁半空而墜于
姓潭散而為萬匹練濺洒林巒掀撼坤軸若銀河
折而挿于地可驚可愕殆不可近淵心有石半出

伏如曝龜頂可容三四人史傳高麗文宗嘗登風
浪忽起有物掀簌之李靈幹投文鞭龍云傍側巨
巖高可五丈白如截肪古今遊士比比題名于此
僕嘗於乙酉冬偶一揮今已閱二載意必雲磨殆
盡醉墨淋漓尚無恙傍行距數步曰龍王堂每遇
旱有禱輒應更上百步左右兩崖各安石佛一軀
俗傳夫得朴朴自此以往境益幽寂樹老堅瘦
梗枿之植排擁無際跨溪綿谷一皆大石伏若怒
虎鼻口相呀如將競噬也行得一潭石狀酷類龜
故云龜潭泓流曲折度略約有寺曰觀音窟即我

太祖潛邸時願刹牧隱所製記猶釘于壁寺後崖
广穹隆狀如屋架其下安石佛十餘軀金泥剥落
面目幾不辨細泉從巖坳而出清冽可比中冷夕
霏已沉林壑晦冥吾數人遂圍坐待堂開戶遊矚
遠近峯巒攢蹙累積都在几席下三更雲霧全沸
變態不常似有盪胸之勢老衲在傍軒睡如雷鳴
各飲白勝湯數椀而賦詩茫洋乎與造物者游東
望土覘洞壑爵盤延袤數十里清淨愈奇由此達
于五冠聖居丙寅辛都事以微疾先還遲明議向
雲居吉祥二寺曾空卒霏微天將有雨微卒不果

徑導舊路幾返檜峴庶老當馬首遙指云上此數
里有寺曰淨慈卑賤預設草具欲慰行色敢邀僉
諾令庶老前導而往寺有南樓甚宏敞面對天磨
峭壁離立數條真竒翫也時雨脚如麻須臾以止
促轡暮抵普通院迤西入巴只洞問前朝寢園所
在村媼近指斷岡外果見一丘陵在草樹中豎尺
碑于側表曰高麗始祖顯陵蔓草石牀班荆如積
有禱賽之狀守陵軍數夫來告云吉儕小人居此
久矣歲時伏臘必潔牲酒上塚不然於陰昏雨夜
有鹵簿鼓吹如君王之行則人患疾十不能一起

也嗚呼三國鼎峙海內搶攘王氏以龍鳳之姿成
位于東方統三為一功莫與京民至于今受其賜
焉第以一死一生理之常雖豪傑亦所不免故一
朝運去長筭促於短日然其英魂壯魄豈反効山
鬼林魅區區要汝食以禍福邪北洞有二陵相望
數百步居人云忠定忠惠然無碑標可識也是日
陰晦道途之困寒凜不可耐登院樓各倒數巨盃
神觀稍定焉入福靈寺幽靜可愛殿有十六羅漢
塑像制作絕妙酷似天台休粒之狀東行過一阡
叢冢壘壘黃茅落日烏鳶低回野老指點謂宮人

斜次詔云豈無春魂化燕飛入未央時邪徑到廣
明寺經歷先生先遣廚人設軟脚局校生數十輩
賚酒殺亦來慰長老出迎云昨者見臨適爾遊錫
未及承顏為媿聞諸君是遊專為采勝貧道但蓄
一畫諦觀之即展于坐閒軒冕采紉蓋帝王儀也
歲久漫漶綃絲應手飄裂俄見軸木細書穆宗二
字四坐莫不駭愕顧以猗昌之資不能制母一朝
賊臣投釁而起買衣而炊請為而馱終有赤城之
行而不返傳曰厲人憐王有是哉五月丁卯早遵
銀篋峴過兵部橋緣松嶽陽道俯臨廣明之洞岡

巒裝積烟霞縹緲似入鴈蕩而登赤城也盤回百
餘折得抵塚頂樹木圍擁自作一區有平家數四
架嚴成落鷄犬蕭然南北峯各有祠北曰大王堂
神像六皆我冠襕笏南曰聖母堂神像亦六戴女
冠塗粉脂廟史立門下曝神衣恚視曰明神不欲
與外人褻予呵叱之令啓戶室內淨潔絳帳施牀
香穗猶重豈古所云八仙宮邪是日新霽天宇廓
清四望無極瀛海為罇罍三山為飮餌俯視人世
蟻蠓紛紛殊有康節洛陽懷古之感相與劇飲數
斗浩浩高歌慨然謝塵埃而飲沆瀣超鵬背而出

九霄矣薄暮乃下清溪寺踞澗石手弄潺湲澡雪
移時遂踰數隴而東得古址乃魯國公主影殿也
當是時天步日蹙嫠有不恤其緯而玄王以一妃
之故勞吾民之力至十有餘年之久足為狂惑者
之戒歷水落巖壑磻噴薄而下全盛時濯錦處也
由王輪寺北距百步曰紫霞洞蔡侍中洪哲舊居
暮抵乾聖寺辛夷已謝芍藥數叢嫣然細雨中把
酒吟賞數匝而罷戊戌經歷公早馳折簡云今日
邀諸君往遊西湖時軍器判官金成慶以公務在
此亦與焉出承濟門穿玉蓮坪逾南神院登永安

城一面依斷岡斗入港口史傳白川正朝劉晞為
世祖築也世祖薨與夢夫人合葬于此故或稱昌
陵昔宋商以手談賭一婦而歸舟纔解纜旋回不
行卜云節婦所感商懼乃還之其婦乃歌禮成江
一闕至今猶傳于湖海間南臨雲海鯨牙雪浪日
夕浩洶珠樓蜃闕變態不常如華蓋磨尼首陽諸
山庚庚似螺髻也少憩步頭膾紫鱗道飲數巡時
有芻豎採姑競來旁觀湏臾篙師連舳艫而進晚
潮方肥遡上三十里間檣鳥高舉迅於過鳥即今
彈琵琶吹鉄笛酒酣各賦長短句雖西湖赤壁之

遊何以浮此逗碧瀾渡有亭清爽石柱為潮所貪
則沒盡三尺款款西轉從別浦而入登見佛寺落
日蒼茫鹽烟遙起鷗鷺群飛舟子鳴榔於樓下矣
僕醉甚鼻息鞦韆可行騁懷景物徃徃錯應人語
次韶瞪目長嘯餘音劃然經歷公微哂曰諸君當
日殊各有態度夜深梵唄已息排尸散步既倦則
忽頽然于蘆荻間不覺曉旭已升於海角矣已已
命僕移舟東浦擢夫鼓枻奏漁父之歌遙見甘露
寺出沒烟霧中樓閣參差正如畫圖妙在遠觀而
不宜近也令緩棹而艤寮主出叙寒暄引入方丈

歷看板上數十篇皆近代諸名公所詠也庭心有
浮屠九層石色如玉雕鏤妙絕直與敬天相埒寺
本李子淵所營形勢規模一倣潤州奇觀勝槩甲
於海東覽遍徘徊小樓掃壁題名而出踰山椒出
開城故縣東有大井窰澄數尺往往狂泡沸騰而
起神魚出沒歷歷可數有潛竇上通山腹驚溜泌
感而即于井其下可灌數千頃世傳銀盃掘井之
語不知何自也井傍有屋數間蓋井祠也東行十
里許北轉入鳳鳴山訪玄正二陵並峙一岡在東
者方中猶拆其始營皇堂也以珠襦玉匣金匱銀

鴈之物為之飾制作極一時之妙雖驪山之役無
以加此東臂女牆如新中樹橫碑碑文倣封三王
東霍光傳敘事李穡撰韓脩書權仲和篆額予摩
挲石羊詠曹鄴詩云壘累壙中物多於養生具若
使山可移應將秦國去舜沒雖在前今猶未封樹
次韶曰使玄陵有靈能無媿邪過後貌驛達黃橋
辛都事預張幕設酒果極歡慰酒闌扶醉入正門
明月滿地五橋珠箔銀燈閃鑠笙歌競沸過太平
館由西小門而還夜已初鼓矣庚午籍田判官鄭
恕來即偕轡向花園恭愍二十三年所創也有八

角殿玉座成塵蛛絲罨戶階下櫻桃數十株方結
子離離殿後恠石成山竒花異卉紛敷砌罅此幸
禍盜竊十餘年間供翫之物今已散落民間者亦
不知幾許細思人失人得不出塵寰之語詎無信
歟歷都評議司西壁間陷置石刻乃鄭三峯所製
記也三槐扶疎八座荒涼某也忠某也姦豈不為
後世皮裏春秋者耶入大廟洞訪圃隱舊居庭草
蕪穢廢為尼坊公雖知天命人心已歸真主而猶
以區區一木謀支五百年之大廈竟伏節以死豈
非天地之正氣鍾於公其生也有自來其死也有

自為耶謹詣穆清殿拜我太祖聖真北出會昌
門過歸法寺故基昔崔冲設九齋學徒每於夏月
避寓於此較藝逐僚惣持洞逾碑門嶺有寺曰靈
通層巒疊嶂回護磅礴宛然一壺中西偏小樓俯
臨絕澗樹陰無罅雖盛暑涼籟瀏瀏起人膚栗板
上有月窓千峯及諸鉅公詩皆清適可誦沙門內
樹義天功德碑金富軾製也樓南有黃楊十餘株
推疑成行老幹磊砢皆竅可翫然後得歐公之賦
所到處寺北最蒼秀拔起者五冠山也本朝歲歲
降香其下址則乃孝子文忠所居也住僧示四畫

慎其一宣宗也其一洪子藩為人魁梧俊偉才幹
絕人自少好學柳墩所知位居公輔十餘年繡縫
調護使忠宣父子慈孝如初謚曰忠正其一永通
洪忠正之孫性喜伺候常附賊賊歷監察大夫後
與林廉同惡獨保首領復典三司事其一尹碩海
平人在忠宣朝巧言令色妬賢嫉能平生行事皆
類此官至政丞是夕鄭判官還籍田與房教授兄
弟金判官入會昌門過成均館謁夫子塑像戴冕
旒服九章前後檐如儼然如在其上也廟堂曰明
倫堂堂左右生師舍也庭畔古栢數株青衿寥落

門戶常關而己幸未議將還留守相公率僚佐設
餞于巖防寺俯視都中千燒萬戰坤靈已死思想
古人或流芳百代或遺臭萬年今皆泯滅之羊無
復有蹤跡為可嘆也酒半上下五百年興廢之由
語及李仁任殺明使烟戶政等事相公遙指一洞
曰此所云王邱洞老嫗所居輪焉與焉歌笑於斯
今盡為鋤犁云壬申歲還房教授率諸生出餞於
天水寺吹笛峯新亭亭即留守李相萬所營也板
上有李仁老崔斯立詩圭復沉吟情境宛然真絕
唱也及見徐成兩學士和篇亦可伯仲閒到籍田

又為鄭判官所拉坐語良久起躍馬過壺串宿次
韶別業是夜江雨蕭颯漁鼓喧闐坐久不能寐少
選隣老送巨鱗一尾撥刺盤中甚可樂癸酉暮食
渡洛河還京師吾儕素以繩墨之身幸偷一閑得
為方外之遊涉旬之間頓覺襟懷蕭爽殊不似舊
時之我其視經營末路熱情都府曾不得一日暇
者為何如也然平生弧矢所期者竊不止此將以
吸燕北之勁氣吞江南之清風倘得如古人所云
舌探囊得詩凡一百餘篇皆即事寓興卒爾而吟
無足採然於一方形勝世道興廢人物盛衰俗尚

三十一
三十一
美惡庶幾備考故彙編于左并書歲月于顛以補
行年紀云

遊金剛山錄

南孝溫

白頭山起自女真之界南延於朝鮮國海邊數千
里其山之大者在永安道曰五道山在江原道曰
金剛山在慶尚道曰智異山而泉石之最秀且奇
者金剛為冠山名有六一曰皆骨一曰楓岳一曰
涅槃者方言也一曰智怛一曰金剛者出華嚴經
一曰衆香城者出摩訶般若經新羅法興王以後
所稱也愚謹案佛者本西戎太子其國距咸陽九

千餘里限之以流沙黑水之遠龍堆葱嶺之險與中國不通安知越中國而東國乃有此山哉非特不知有此山亦不知有朝鮮國者以史考之當周昭王之世我邦箕子朝鮮之中葉佛實生於西方舍衛國其佛說千函萬軸中說無限世界而曾無一語稱朝鮮國者則其不知此國此山明矣豈非佛說法時誇大其事以謂海中有金剛杵怛衆香諸山而有億萬曇無竭率其眷屬以駭愚俗如莊周鯢鵬天池之說姑射貝茨之論寓言於冥冥之中驚俗於高大之境而然者乎此不過震動黔黎

劫誘無識者而豈真有金剛杵怛如是其恠者乎
佛之寓語如是而羅僧學佛者亦妄自高大其國
以楓岳指為金剛而追作曇無竭之像以實妄語
乎且佛氏之海中者安知指東海乎東西南北莫
非海也豈獨東海為海中而以楓岳定之為金剛者
乎且我邦於中國雖云海外而西北陸連遼東其
閒只隔鴨綠一江鴨綠江固非海矣其指我邦為
海中者謬甚矣然金剛之稱歷世既久難可猝變
余亦指為金剛山也蓋其為山跨天南北而翠律
壓后土之洪濛大峯三十有六小峯一萬有三千

一枝南延於二百餘里山形竦峭略如金剛本岳者曰雪岳其南有所率嶺岳東一枝又成一小岳曰天寶山天將兩雪山自泣故或曰泣山泣山又蔓迴於襄陽官後走於海濱五峯特起曰洛山金剛一枝又北延於一百餘里有一嶺名曰湫池湫池之山又於通川官後周遭殘山如線之不絕北轉而入海中曰叢石亭山之東曰通川高城杆城郡西曰金城縣淮陽府列置山下者凡一府三郡一縣大歲乙巳之四月望日余發長安宿普濟院丁卯行九十里宿笠岩戊辰過逍遙山涉大灘行

六十里宿連川居仁家己巳過寶蓋山又過鐵原
古東州野南頭行一百餘里宿金化甲士鄭時成
家庚午過金化縣行六十里宿金城鄉校辛未過
昌道驛涉菩提津行七十八里宿新安驛壬申滯
兩宿新安後洞百姓沈達中家癸酉度牛犢峴過
花川縣涉菩提津上流赴楸池洞循溪而上天氣
甚寒山木嫵風而亞脆葉纔出棠梨開滿杜鵑未
衰覺天氣寒於漢陽二三倍矣楸池者菩提津所
從出者津到金剛山外堦率與金城津合又歷盡
山麓而與萬瀑川合又至春川與瓶項津下流合

為昭陽江古有樵夫偶到其處再尋之則不得矣
山下人相傳為仙境云嶺上有楸池院過院則東
邊天色甚碧雲山曰此非天乃海水也余刮目更
察然後辨其為天與水也其水距岸漸遠而漸高
遙與天相接平生觀水盡為兒戲矣自嶺而東下
也天氣漸溫躑躅方開木葉成陰始覺夏氣往往
斫木補道所謂棧道者也時時於馬上摘山杏以
啖之自嶺行二十里有中臺院又行五里於川邊
攤飯始履平地又行十五里抵通川郡是日山行
捲九十里地行十五里見郡守子子達子達館予

予衙別室子達尊公遇予甚款甲戌辭子達行十五里抵叢石亭余至其下果有石山入海曲逶迤如蛇形山之入海極頭有四仙亭未及亭三四十步北越一路則有四石起自海中截然如束柱石然所以得名叢石者此也海西邊岸盡為叢石形亘里餘叢石之傍有一平石亦在水中而小石雜積連陸余與雲山赤足下岸坐平石上令奴入採石決明小螺紅蛤海藿等物與雲山掬水相戲舉眼眺瞻則乾端坤倪軒豁無涯如瑠璃明鏡相照韋偃郭熙効技然恍然疑是夢中久乃可明余眷

顧不肯出雲山曰日已晏矣余始出岸上四仙亭
亭有孫公舜孝懸板詩又多僧人釋子名號余
坐其中俯視滄溟四叢石尤奇所見略與下平石
同而眼界則尤濶矣亭南有碑傾側字沒不知何
時所立亭東約四五十里許有一島在海中宛然
若相對然亭岩下有二舟往來釣魚岩南有漁店
漁人曬網其間水中雜鳥飛鳴左右或體白體黑
或觜長觜短或觜紅觜青或尾長尾短或翰黑翰
青不可以數余題四言四章於亭柱居無何風浪
起余下來循海邊白沙而行沙虛馬蹄易沒唯水

邊浪痕堅不沒蹄然海濤時或衝岸至於馬韉馬
皆驚怖出岸令奴引馬韉行風景尤奇往往沙嘴
成山海惡時流波所聚也又有海水於沙邊或瀦
而不泄者或瀦而入海者又有小白石雜成海岸
者又有衆石巉岩立海濱如錐者如鞭者如人者
如獸者末大而根銳者根大而末銳者沙石之邊
海棠相屬不絕或花或莖或紅或白或開而單葉
者或開而千葉者余於中道攤飯行六十里過童
子院宿登道驛夜大風發屋拔木乙亥發登道過
萬安驛所經陂澤甚多海濱所見如前日至瓮遷

積石成岸略如叢石之百一歷盡遷上有石小陂
如磨蒼玉有川自西而入海周於岩下洞如明鏡
令奴人采藿烹羹采石決明鹽魚以配午飯過長
井海邊抵高城溫井井乃金剛山北洞也是日行
六十里至此始聞杜鵑聲丙子以風留溫井丁丑
入金剛山行五六里越一峴而南入新戒寺之墟
峴東曰觀音峯北曰彌勒峯彌勒峯之西有一峯
北彌勒峯而加秀不知其名又其西有一峯遠在
雲表毗盧峯之北枝也新戒寺即新羅九王所創
也有僧智了改創鳩材矣寺前有指空百川洞其

南有大峯曰普門峯也峯前有世尊百川洞東有
香爐峯峯東有七六峯相屬成一大山比於觀音
彌勒峯不知其幾十倍其一毗盧峯之一枝其二
元寂峯之一枝其三上平者鴈門峯之一枝其四
繼祖峯之一枝其五上不思議其六中不思議其
七下不思議不思議者庵名也新羅僧律師所創
也七峯之下有大明大平吉祥兜率等菴在世尊
川傍余步指空川越普門庵山行五六里繇竹成
徑及到庵下則社主祖恩乃雲山故人遇我頗有
恩意坐庵上東北望海東南見高城浦菴前有懶

翁勤禪師自照塔坐定祖恩饋生梨栢子訖進飯烹木耳石耳為饋山蔬極備時杜鵑午啼可卜山深矣飯後辭祖恩山行約五六里涉世尊百川水又行一二里左視梵率菴而東又行五六里涉一大川循川東偏而上行五六里過鉢淵又行半里至鉢淵菴僧傳云新羅時有僧律師入此山鉢淵龍王獻可居之地於是創社曰鉢淵菴云菴後有一峯在普門望見七峯之末峯也菴上少許有瀑布橫垂數十丈左右皆白石滑如磨玉可坐可卧余解裝掬水漱口飲蜜水鉢淵故事釋子遊戲者

乃於瀑布上折薪而坐其上放於水上順流而下
巧者順下拙者倒下倒下則頭目沒水久乃還出
傍人莫不酸笑然其石滑澤雖倒體不損傷故人
不厭為戲余令雲山先試之繼而從之雲山八發
而八中余八發而六中及出岩上拍笑大矣乃枕
書卧石成小睡社主竺明來引余入社使見社後
碑石乃律師藏骨之碑高麗僧瑩峯所撰時承安
五年己未五月也碑側有枯松二株自律師碑立
五百餘年三枯三榮而今復枯矣覽畢還下菴明
饋飯飯後又到瀑布夜深天寒始入來戊寅發鉢

淵涉瀑布下流陟小人嶺嶺路險惡而峻步步仰
上得名小人信不虛也余十步九歇方陟初嶺楡
岵山在左不思議峯在右東海在後歡喜岵在前
小人嶺凡八漸前而漸高至於第七嶺則與三思
議峯齊諸山盡在目下通川高城杆城三郡列置
山底眺望溟海與天為際陟第八峯則不思議峯
風斯在下矣自此而西轉從山陰行路甚絕峻側
栢橫路冬青雜生積雪滿谷松蘿蒼樹余踞虎豹
登虬龍攀枝以行勞甚取雪和蜜而飲渴肺頓醫
已而復謁逶迤匍匐得登歡喜岵高於小人第八

峯又加一二等站東土峯一站西石峯三越歡喜
而南下也躑躅成林天寒甚而不花矣至一小溪
洗手頰面又越一小峴抵堯率庵庵一名柏田自
鉢淵至此三十餘里入庵坐良久還出上道行一
里許入寂滅庵有一僧袈裟入定矣庵後上山一
曰寂滅峯庵前巷東石山一曰成佛峯過庵又轉
而西北行直下一洞有二川交流水石明爽乃十
二瀑布源流也涉川而上有開心庵入庵則有一
僧衣衲而已又登開心前臺望見諸峯前有寂滅
一峯後有開心後二峯左有白石一峯二十有五

頭其下有雲栖窟右則洞口也還入菴攤飯見京
來居士宋生者其語甚詭雲山曰今者天日尚早
不可止宿此菴祇可復行余從其計越開心後站
站高於歡喜站又加一二等自此石木皆白左歷
二峭峯並立右歷一石峯如錐峯下有繼祖窟南
邊有二峯松栢葱鬱陟二峯之交高於開心後站
又加一二等從站右南下也側栢塞路杜鵑閒開
馨香擁鼻洞乃大藏洞也川石明快所歷無此比
洞又幽復深邃窮川源則三四日方到毗盧峯云
姑以眼所及記之則川之北石峯五南石峯二其

一則白石疊成如積書冊然胡僧指空指此曰此石內有大藏經洞因此得名解衆坐元良久欲爲暴宿岩石之計雲山曰霧氣襲人可畏今日雖暮猶可至元寂菴子從之循大藏峯而西五石峯在右九土峯在左而洞水南注泓流而下挾右山腰陟一大岵名曰鴈門岵鴈門峯之南枝也岵高於大藏後岵又加一二等下岿而西循澗而行左有山皆松柏不辨其峯右有五六峯皆內山之南枝也川南土山之西有三峭峯見其頭其一觀音峯峯下有石如佛形故得名然也其下元寂川與鴈

門川相合清曠略與大藏水等坐玩湏臾泝流而
北上所踏皆溪邊白石左右山數十餘頭圍如雪
屏已而至元寂則庵後有大峯加於衆峯不知幾
百倍所謂元寂峯峯南有峯比元寂峯甚卑而比
諸峯亦有徑庭所謂元寂香爐峯也菴東南望見
一土峯高如元寂峯而其上凹所謂鴈門峯也僧
云獅子育兒其上自栢田至此又三十里菴有僧
戒能稍解文字己卯歲元寂從故道下至鴈門水
交流之石上洗手漱口循流而下過文殊菴至妙
吉祥庵庵在溪邊水石甚曠自此躑躅始開矣川

南有四峯川北有石壁削立者一余坐川石上漱
齒入庵題名庵有老僧道逢者龍門邪僧處安檜
岩邪僧策卞皆禮而師之以此名重諸山得貨最
多見我禮甚踞余不言而出循溪而西有寺基基
上有石佛刻在石壁間寺基下有大石上平臨在
川上余坐其上小歇寺基以北有峯八以南觀音
峯以下有峯五北八峯之後有二大峯露其頭其
一元寂峯西面其一月出峯南面其下有佛知庵
去賓窟余過二庵至摩訶衍前臺有曇無竭石像
臺乃此山之正中而曇無竭乃山之主佛僧俗過

此者莫不攢手拜過雲山以杖叩其額入寺中寺
有老釋懶融出與余語示摩訶衍事跡時有鳴鳩
馴擾庭下可卜山人無機矣庭中有草其形如韭
其花少紫融曰昔指空入此山曰此山土石皆佛
獨此空地立此而禮山頂之石觀音其所立地生
此草至今百餘年不衰山人呼為指空草指空者
南天竺國術士麗季來入以其術廣布佛法云余
請萬景臺路於融融頗惡之毘盧頂上不可踏余
辭融至萬灰庵令奴人炊飯裹之上萬景臺萬灰
僧亦惡而止之曰無路不可去雲山亦不欲余強

行越一山頂下一洞又上一頂攀枝以下積葉沒
膝朽木交橫東西皆迷一鳥不鳴但瀑布數丈飛
鳴於林表而已雲山緣石以登則瀑布之上又有
瀑布如前雲山身竦艱難得下曰山路已失不可
臆度樹木之下以求無人之境不如還去余從其
言還出故道而來至萬灰攤飯還過摩訶衍又過
妙逢獅子二庵至獅子頂其石有鐵鎖垂下以為
人攀上之資閔漬榆帖記云胡宗旦入此山欲厭
之有獅子當頂拒之宗旦不得入雲山指山頂一
石曰此獅子形也余詳視之頗不類獅子乃頑然

一圓石也川水至此則尤加竒麗十餘里一白石不斷處處瀑布其下深潭潭下亦有瀑布故洞名曰萬瀑洞所以記瀑之非一也余循西邊而下自獅子頂下西邊有峯四其一潤筆峯其一毗盧峯之香爐峯其一香爐次峯其一金剛臺東邊有峯三皆無名歷盡三峯而有普德窟窟前川邊有白大石平可坐數百人上下瀑布瀑下皆淵坐石仰見庵子甚竒中使鄭同之來觀此山也有一頭目誓天曰此真佛境願死於此作朝鮮人長見佛世界乃投水而死今之上淵是也余題名岩側登窟

則積石為雲梯高可數百餘丈沒其階則有庵掛於壁間以二銅柱約數丈者撐之柱上構一室作一鐵鎖一端著柱一端著石又為一鐵鎖圍其室而著兩端于石置觀音塑像其上又作一社為僧所住又其傍為一室為庖廚僧舍之西觀音窟之上築一臺曰普德臺其曰普德者觀音化身名也余先入僧社則乃故人東峯清寒子壁記虛舟持正丹青畫手俄而自社下窟有鐵鎖二余攀下樓板聲咿軋可懼所謂觀音前額狀頗多予出歷觀臺上還入僧舍飯訖下來復循川流而下白石滑

澤赤足而行亦不生蠶已而前至手巾岩東峯記
云觀音化為美女洗手巾于此岩為僧懷靜所逐
入岩下云岩石橫斜或成深淵或成瀑布岩邊可
坐萬人見之心神舒暢余坐卧弄水玩其奇好不
得去雲山促行下表訓寺西自金剛臺以下所歷
十一峯東自普德窟以下所歷七峯是日山行搖
三十里住持智熙者雲山故人待余甚厚燃燈饋
茶飯寺有至元四年戊寅二月碑乃大元皇帝所
立奉命臣梁載撰高麗右政丞權漢功書記其皇
帝飯表訓偈作萬人結緣也碑陰載太皇太后出

銀布若干英宗皇帝若干皇后若干觀者不花太子及二娘子若干完澤禿瀋王等大小臣僚若干此即記舍施也是夜館余於小寢親之也庚辰智熙饋朝飯極辦山家之味饋予奴從亦厚臨別以扇一鞋一贈余又贈雲山如之余從川邊行五里許東南入一山樹底行仰不見天所歷峯巒不可計又行五六里許有故城疑倭賊避亂時所築歷城基上一高山頂東偏有二菴曰大松蘿小松蘿自此余足生重行甚難溢至大松蘿卧歇成睡睡覺請寺僧性湖為山行鄉導登望高臺從庵後東

遶山上攀側柏枝排木枝登一山頂又直下山腰
之半復轉而北上仰見白石削立不知幾千丈若
垂若墜往往鐵鎖垂下手引而登出僧床鷹岩兩
峯之間僧床之名以峯下有石如僧床也鷹岩之
名以峯上有石如鷹形也鷹岩北上絕壁或攀木
枝或攀石角捻計岩上行約十餘里許陟臺上四
通五達僧床鷹岩二峯却在山底前日萬瀑洞所
歷諸峯如丘垤不可辨但見真見性峯當北面其
峯後出盧峯勢若撐天比諸峯不知幾百倍乃知
平地之仰見者乃其枝葉耳非上峯也峯西有萬

景臺白雲臺衆香城其次有摩訶衍後峯相屬於
毘盧峯如成一岳東北有鴈門峯次於毘盧峯鴈
門後有大藏上開心諸峯只見峭頭如筆鋒然諸
峭峯之南有二峯卑於諸峭峯二三等名曰十王
峯峯後有十王百川洞川傍有寧原庵雲山嘗遊
於此云又十王水下與萬瀑洞合流為長安寺前
川十王峯後百川洞東有一土峯上平而差高於
十王峯曰天燈峯其南有峭峯高於天燈一二等
曰彌勒峯天燈彌勒之間有二峯露其頭曰觀音
峯地藏峯彌勒峯南有土峯卑於彌勒峯一二等

曰達磨峯達磨峯西亦有一土山卑甚不知其名
山之南即金藏銀藏面也長安寺西北有新林寺
新林寺西北有正陽寺正陽寺西北有開心臺臺
西有開心庵其山通趾頂樹木葱葱蔓回於一面
然其峯甚卑非諸峯比也開心臺北有土山甚高
與彌勒峯東西相對名曰西水精峯峯南有熊虎
菴峯後有水精庵即毘盧峯北面水所注之洞也
開心臺之後西水精之南有一土山差高於開心
後山名曰髮嶺僧云高麗太祖將兵過此上此嶺
望見毘盧峯無數向禮斷髮掛枝以示欲入沙門

之意故名其嶺曰髮嶺云余坐臺石上問峯名畢
回瞻四顧則神氣怡然浩浩乎覺其身之高矣移
時欲下來安邊僧四人繼上與四僧偕下四僧歸
上雲岵余上僧床石心神竦然可懼還下來至松
蘿見壁上有故人大猷名字及絕句一首是日山
行撙二十五六里後四月辛巳發松蘿經故城基
南下一洞左歷二峯右歷四峯至安養庵庵後有
羅漢殿開明可坐余坐其上書日課庵前有深淵
名曰鬱淵金同野陷也金同者麗時富人平生佞
佛作庵鬱淵上諸岩面皆刻佛像供佛齋僧米馱

連屬開京指空入此山以同為外道同不服指空
作誓曰汝是我非則今日我蒙天禍我是汝非則
今日汝受天禍同曰然空入宿摩訶衍夜雷雨果
作金同寺為水石所擊同與寺佛寺鍾寺僧等同
時陷入鬱淵云鬱淵上里許有金同寺基過安養
東轉山腰也躑躅絲竹青紅滿徑赴彌陀庵後
有七峯列立庵前有水乃鬱淵下流也請於主僧
解蓬飲茶一碗食後左歷明水地藏觀音三菴右
歷養心靈碎二菴十王百川水於此與萬瀑洞合
流過此則川石青黑色自彌陀行十餘里抵長安

寺寺乃新羅法興王所創元朝順帝與奇皇后重
創外門有天王二軀最內有法堂坐有大佛三軀
中佛二軀佛前有金額曰皇帝萬萬世堂之四面
有小佛一萬五千軀皆元帝所作其東側有無盡
燈燈內四面皆銅鏡中置一燭傍立衆僧形乃燃
燭則衆僧皆如執燭然亦元帝所作五王佛之上
又有五中佛福城正所作也堂之西室有達磨真
東北隅有羅漢殿堂坐有金佛五軀左右有土羅
漢十六軀羅漢之傍各有侍奉僧二軀技極精巧
羅漢殿之南有一室室內有大藏經函刻木成三

層屋中有鐵臼置鐵柱其上上屬屋樑置函其中
執屋一隅而搖之則三層自回可玩亦元帝所作
觀畢住持祖澄饋茶飯飯後冒小雨循故川邊而
上過鬱淵普賢庵至新林寺少歇自長安所歷諸
峯並其朝日所經七峯十王洞口望見諸峯計之
則川東有峯二十有九川西有峯十有八自此以
上則載在前錄自新林上天親自天親上正陽則
拜站在右僧云高麗太祖入山時五萬雲無竭見
身此站太祖無數呈拜因名為拜站自正陽又冒
雨西上樹林底約十里許登普賢嶺又西上三四

峯七又越潤筆庵嶺過潤筆庵又越獅子嶺而東則即曩日所見獅子庵也自此所見峯巒亦載前錄山川無異白石如前但川兩傍躑躅花去夜雨盡開纓纚相屬或成一田可玩也余從故道泝流而上未及鴈門站東南入一洞攤飯越水站而東下左視川流右挾南山行樹陰中左歷峯七右歷峯四而北涉川水陟一高山下至成佛庵坐庵上望見東海雨後益明非前日比有客僧竹熙者為余炊飯飯後與竹熙性通寺歸見佛頂庵菴於去年災於火矣登佛頂臺臺中有穴連山下深潭有

風出其中僧云昔有龍女出此穴奉茶於佛頂祖
師其語甚麗臺下有青鶴年年育兒其中云余坐
臺上望見東有海水西有鴈門北有上開心寂滅
柏田等寺其下白岩成一壁有瀑布垂下十二層
半入林表余所望見者六層而已黃昏還投成佛
庵是日山行六十里癸未在成佛望見海中自黎
明天東赤色須臾日輪飛上海色盡赤日上三竿
海色澄白余作短篇以記之飯後越一小峴行十
里赴榆岾寺九淵洞水源出彌勒峯至寺前與水
岾川合流寺有水閣跨川南北遊鱗飛躍於前有

大水則連魚松魚皆至水閣下寺之外門曰解脫門有天王二軀次曰般若門有天王四軀次曰泛鐘樓樓傍一室有盧僭像最內有能仁寶殿殿內刻木作山形有五十三佛列立其間殿後有一井名曰烏啄水始以烏啄得之也寺有明社主者出示默軒閔漬榆站記其意略曰五十三佛本西域舍衛國不見世尊三萬家承文殊師尼說鑄成釋迦像盛以金鍾浮海任其所之佛至月氏其王作室置佛其室災佛夢於王欲去他邦王盛佛鍾中又浮諸海佛至新羅國高城江太守盧僭請佛所

欲居佛入金剛山偕隨後尋之有尼坐石上導其
路者地名曰尼臺有狗於帖上道其路者地名曰
狗帖有獐於峽口道其路者地名曰獐項至於佛
之所住處聞鍾聲歡喜者地名曰歡喜帖偕聞於
南解王作大伽藍以安佛像者名曰揄帖寺謹案
閔漬之記有六大妄說而無一可取者金無浮水
之理其曰舍衛國所鑄鍾佛浮於海中歷月氏而
到新羅一大妄也金無自行之理其曰泊高城江
金佛自入金剛山揄帖又避湯沸飛入九淵洞岩
石上二大妄也佛本西戎之教自後漢明帝時始

來中朝而又數百餘年南北朝時當新羅之中葉
流入于東土小臣異次頓贊成其法載在國史其
曰當前漢平帝之世新羅第二南解王之朝有此
事始創楡岾寺三大安也假如閔漬之說佛雖於
漢明帝時始來中國而我國之有佛肇於南解實
先於中朝則何以史籍不載乎東人無知奉佛如
父夫以王太祖之高明未免於俗習尚曰我之有
國實賴佛力當是時假有此事則必誇其筆大其
言而載之史矣史猶不載而漬乃信其野人之語
而記之四大安也假有此事東人之有僧有尼必

自此始之而前此無有法章章矣其曰盧偃之尋
佛也有尼道其路未有佛法之前安有僧尼五大
安也且以中朝人物之多聞博見尚未通於西域
之梵書有與胡僧譯之而後其文明於世舍衛月
氏國所錄金鍾之字盧偃又安能解之哉况其時
文籍鮮少人不解字而其言西域事跡明白則六
大安也甚矣漬之無稽也有六大安而無一語可
補於名教者則知此記闕之可也而况三國之初
人無定姓而名字不類於人則盧偃名字疑亦後
世所作豈非新羅季世有文術僧元曉義相律師

之徒始欲誇大此山事跡而追述者歟不然何其
謬誤之若是乎歷覽畢出坐水閣明為送于川邊
過改服臺臺即丙戌年榆岾佛事時車駕改服之
所也又過丹楓橋於橋頭少歇又過獐項逢馬從
迎我者自溫井來乘馬越狗岾岾路險惡或乘馬
或下馬過尼臺石自岾至平野於乾川邊攤飯過
蹲房投高城郡自榆岾至此六十里太守趙公與
予先祖友善見余厚遇時適有襄陽守柳自漢先
在坐盤饌甚備甲申太守為柳襄陽為三日浦之
遊余從之三日浦者新羅時有花郎安祥水郎之

徒遊三日乃罷故名焉浦口岩壁間有丹書六字
仙徒所書也水方四五里中有一石島有長松數
株故名曰松島東南隅望見石如龜故名龜岩龜
岩之後有白岩率律於海濱名曰雪岩水北有夢
泉寺故基真絕境也余從訓導全大倫及柳襄陽
乘舟泊松島又棹舟至丹書岩下果有六字曰水
郎徒南石行其字為石所亂擊大倫曰前有厭客
太守客來郡者必欲觀丹書故太守惡其供費欲
擊碎云然其字畫不泯可解讀余因問其文義大
倫曰水郎者新羅四仙之一而南石者指此石也

行者行于石也世之文人皆解如是余惟此石自
高城視之則在北自金剛山視之則在東北自東
海視之則在西其稱南石尤不可解且六字成文
文理大踈類兒童手古人文法應不如是若非出
於兒輩之好事則是水郎之徒有姓名南石行者
題名乎泊舟登石上其頂有為彌勒佛埋香碑高
麗時所立舟還松島終日宴飲盤饌甚盛或令漁
人網魚斫膾或聯句唱和午後大風作太守惶懼
還舟余還溫井乙酉入湯井浴丙戌浴丁亥浴戊
子浴初出歇己丑庚寅歇得家書慈堂安穩辛卯

回程發溫井行且采薇過高城郡又過萬戶渡乘
舟渡高城浦於江邊炊飯嶺東民俗每於三四五
月中擇日迎巫極辦水陸之味以祭山神富者馱
載貧者負戴陳於鬼席吹笙鼓瑟嬉嬉連三日醉
飽然後下家始與人買賣不祭則尺布不得與人
高城俗所祭乃是日也行路處處男女盛粧絡繹
不絕往往稠如城市過雪岩山以南奇石甚多過
安昌驛登安石島細石連陸箭竹成林竹下有海
棠花花下有白岩或平或立或積或碎余歷回島
下坐卧遊玩還出過仇莊遷亦奇境差後於瓮遷

涉蛇川過明波驛於川邊攤飯越戍山還從海邊
至茂松亭亭正在海曲而亦連陸路長松生其頂
白石成其麓高於安石又不知幾倍矣過烈山入
杆城境宿浦南氏舍是日泐海行揔一百二十里
壬辰冒雨發浦南過盤岩行十九里雨甚止宿杆
城客舍太守元輔昆饋酒飯雲山醉倒癸巳雨霽
發過門岩泐海行四十五里抵清澗驛有樓臨水
樓後絕壁削立樓前衆石巉岩余登樓後壁上所
望左廣西見雪岳兩脚如注天南午日止中海昏
於前花明於後奇玩不可數計於壁上澆飯又行

海濱過沙嶺海曲是時東南風急海濤衝岸如千
兵萬馬水所激處紫虹立成隨立隨滅真壯觀也
望見竹島白竹如烟竹下石上海獺成行而群鳴
鳴聲與水聲合雷動海曲又至腐石自清澗至此
二十里又右歷天寶山到松亭自此望見洛山行
二十里入洛山洞又行十里抵洛山寺此歷陂澤
其大十餘里或二十餘里者六涉大浦二大川二
過竹島三名岩奇石不知其幾也洛山者新羅僧
義相所創寺僧傳其事跡云相見觀音親身於海
邊窟中觀音親授寶珠龍王又獻如意珠相受二

珠於是創寺取旃檀土手作觀音像今之海邊小
窟乃其觀音所住也庭中石塔乃藏二珠塔也觀
音塑像乃其相手作者也戊子年閒有妖僧學悅
建白於寺基作大伽藍自居其中盡取傍民田以
為己業今悅死一年矣其徒智生嘗媚於悅悅死
而盡得奴婢田貨管其利寺前有一亭臨海柿林
周匝竹木徧山余坐亭上望海下亭歷陂下至大
竹林還過廚舍下口谷左歷岩石披小竹枝將半
里至所謂觀音窟者有小銅佛在窟下小室不蔽
風日室下海濤激石山形如掀屋板長鳴余下至

洞口雲山與僧繼千來迎我至寺智生出迎館待
甲午平明余坐亭上望出日智生饋朝飯引余見
觀音殿所謂觀音像技極精巧若有精神焉殿前
有正趣殿殿中有金佛三軀余出道南路西轉而
行行將二十里至襄陽府前川上歇馬又行十里
入雪岳陟所於嶺下峴則川水在左峯巒在右過
盡山麓涉川流而左山明水秀白石交加略如金
剛山大藏洞汭流而上至五色驛山月已白矣是
日陸行三十里山行四十里乙未發五色驛度所
率嶺雪岳亂嶂無慮數十餘峯皆頭白溪邊石木

亦白俗號小金剛山非虛語矣雲山曰每八月諸
山未霜而此山先雪故云雪岳嶺上石閒有八分
書一絕云生先檀帝戊辰歲眼及箕王號馬韓留
與永郎遊水府又牽春酒滯入閒墨跡尚新書之
必不久也世無仙者豈非好事者偶題歟然子程
子以國祚之祈天求命常人之至於聖人以比修
陳之引年深山大澤之中亦有這般等人未可知
也讀其詩令人有出塵之想余於嶺上辭東海下
嶺西南行樹底道塗險絕洞壑幽深折取丁香花
插馬鞍以聞香過眠岩行將三十里歇馬過新院

又行十五里有川自雪岳西面流來者與所率川
合流至元通驛下為大江前至元通山川曠莽甚
佳自元通履平地又行二十五里涉元通川麒麟
縣水於此合流循江行五里宿麟蹄縣是日山行
六十里陸行三十里丙申乘舟渡瓶項津西南行
過船遷又西南行過萬義驛又行山閒入洪川境
宿泉甘驛捲行八十里丁酉又西南行越馬嶺又
西南行循大江而下過仇叱遷迎逢驛行六十里
赴洪川縣見縣監伯起同宿戊戌乘舟渡前江越
掛戕嶺歷白同驛山後過砥平縣又過天谷院西

南入石徑是日行捲九十里宿權校理景祐家己
亥冒小雨西行涉天谷川下流過吾賓驛楊根郡
又過月溪遷隅院腰院末院渡龍津宿奉安驛是
日行捲八十餘里庚子過豆尾遷平丘驛涉中寧
浦行七十里入京捲計山行四百八十五里海行
二百七十四里陸行九百三十七里乙巳後四月
二十一日辛丑記

續頭流錄

金駟孫

士生而瓠瓜一方命也既不能遍觀天下以畜其
有則域中之山川皆所當探討者惟其人事之喜

違也常有志而未副願者什居八九予初求為晉
學其意則便養也而勾漏作令葛稚川之心又未
嘗不在於丹砂焉頭流在晉之境既到晉則日理
兩殺頭流之烟霞猿鶴皆予之丹砂也二載臯比
徒重腹便之譏則引疾于鄉以遂倘佯之志而足
迹未嘗一及于頭流豈非素志之未副者也然頭
流不敢忘懷也每與曹大虛先生共卜一遊而大
虛簪纓有累予阻於道途之往來未幾大虛丁內
艱而去天嶺矣天嶺上舍鄭伯勗予之神交也今
年春歌鹿鳴於道州適過吾門約觀頭流無何金

相國殷卿出按嶺南屢以手柬期而未赴四月十一日己亥追其行上謁於天嶺問天嶺之人則伯昂賦二鳥於京師而還其廬已五日矣遂得相選雅喜其宿願之不悖金相國將挽予以自隨予辭以山行有約相國強之而不能奪也則資行以送仍恨簿書為累羸瘵已甚未得從之遊介介不已新天嶺李先生箴乃予杏壇執經者也資我亦厚天嶺人林貞叔亦從以備三人之行十四日壬寅遂自天嶺南郭門而出西行可二十里渡一溪水抵一逆旅名曰蹄閑自蹄閑西南行上下岡隴可

十里兩山對峙一泉中注漸入佳境矣行數里陟
一岵從者曰當下馬拜予問所拜荅曰天王予不
省天王是何物策馬而過是日雨下如注嵐霧渾
山從者皆蓑笠泥滑路澁相失在後信馬到登龜
寺山形穹窿如龜以寺登其背而名也古砌絕峻
砌隙有幽竇澗水自北而注其中漉漉然其上有
東西二刹一行皆寓於東刹汰還從者雨勢竟夜
終朝殊未已遂留寺宇各就午寢僧忽報雨霽頭
流呈露吾三人驚起刮睡眼視之則蒼然三峯偃
蹇當戶白雲橫斜翠黛隱映而已少選又雨予戲

曰造物其亦有心者歟潛形山岳似有所猜伯勗
曰安知山靈久聞騷客為計耶是夜復晴皓月流
光蒼顏全露稜稜壑谷若有仙人羽客來舞翩翩
也伯勗曰人心夜氣於此都無查滓矣予之小蒼
頭頗調威篋令吹之亦足以傳空山之響三人相
對夜分方寢遲明吾與伯勗著芒屨策扶老步下
登龜一里許有瀑布可觀行十里許穿一孤村村
多柿樹崎嶇經丘緣山腰右轉而西北行巖下有
泉掬而飲之仍盥手出一步到金臺菴一僧出汲
予與伯勗率爾而入庭中有牡丹數本半謝花甚

紅百結衲子廿餘方荷袈裟梵唄相逐回旋甚疾
予問之云精進道場也伯勗頗解之曰其法精而
無雜進而不退晝夜不息以為作佛之功稍有昏
惰其徒中捷者一人以木長板拍而警之使不得
惱睡予曰為佛亦勞矣學者於作聖之功做得如
此則豈無所就乎菴有六環錫杖甚古物也日亭
午由舊路而返下瞰石澗暴漲如湖遙指上無住
君子寺欲往而不可渡矣山路將下甚側足不停
地遂以杖柱前滑漚而下鞍馬已候於山下騎行
纔移一步吾所乘獨蹇一足如下杳然顧謂伯勗

曰寒驢風味詩家固不免矣公澗北崖東行至龍
游潭潭南北幽邃奇絕塵凡如隔千里貞叔先待
於潭石上具饌以待點罷遂行時適新晴水襄兩
崖潭之奇狀不可得而窺矣貞叔云此佔畢公為
郡時禱雨齋宿處也潭石鱗鱗如田之畇畇多宛
延之迹又有石如甕如釜鼎類者不可勝紀民以
為龍之器皿也殊不知山澗湍急水石流轉相磨
之久而至於成形甚矣細民之不料事而好誕說
也由潭而東路極險阨下臨千尺竦然如墜入馬
脅息而過者幾三十里隔岸望頭流之東麓蒼藤

古木之間指點先湮古湮等方丈不知其幾也一
輦如隔弱水雖欲跋一步以登而不可得矣路漸
低而山漸夷水漸安流有山自北而斗起為三峯
其下居民僅十數屋名曰炭村前臨大川伯勗曰
此可居也予曰文筆峯前尤可卜也前行五六里
篁竹林中有古寺曰巖川土壤平曠可以廬其居
也由寺而東一里赤壁千尋人鑿斜逕於壁間而
行一里許踰一小峴北行出貞叔田園之下貞叔
邀請不已日已暮又恐雨益甚水益漲辭曰王子
猷到門而返不見安道况今與貞叔共數日之遊

不必更入門矣貞叔謝以足疾未得卒陪杖屨云
與之別黥黑投沙斤驛兩股疼痛更不可步翌日
盡還天嶺來隨人騎馬行一里許並大川而南皆
巖川之下流西望蒼山巒纍然抑抑然皆頭流之
支峯也午投山陰縣登換鵝亭覽題記北臨清江
有逝者悠悠之懷少歌枕而覺噫擇而處仁里知
也棲而避惡木明也縣號為山陰而亭扁以換鵝
其有慕於會稽之山水者乎吾輩安得於此永繼
東晉之風流乎由山陰而南及丹城所歷溪山清
秀明麗皆頭流之緒餘也新安驛十里舟渡津而

步投館丹城予喚丹丘城而仙之丹之守崔慶甫
資送加厚花砌上有烏竹百竿擇其可拄者根斬
二竿分與伯勗自丹城西行十五里歷盡阻折得
寬原一清冷注其原之西緣崖而北三四里有谷
口入口有削巖面刻廣濟品門四字字畫硬古世
傳崔孤雲手迹也行五里許見其竹籬茅屋烟火
桑柘渡一溪進一里柿樹環匝而山之木皆栗也
有藏經板閣巋然繚以周垣垣之西上百步樹林
閒有寺扁曰智異山斷俗寺有碑立門前乃高麗
平章李之茂所撰大鑑師銘完顏大定年間建也

入門有古佛殿龕斷甚樸壁畫二冕旒居僧云新羅臣柳純者辭祿舍身創此寺因名斷俗畱其主之像有板記在焉予卑之不省循廊而轉行長屋下進五十步有樓制甚傑古樑柱撓腐猶可登眺憑檻臨前庭有梅數條相傳政堂梅乃姜文景公之祖通亭公少讀書於此手植一梅後登第官至政堂文學遂得名其子孫世封植之云出北門驀過一澗榛荒閒有碑乃新羅兵部令金獻貞所撰僧神行銘李唐元和八年建也石理麤惡其高不及大鑑碑數尺文字不可讀北垣之內有精舍往

持所燕居也繞舍多山茶樹舍之東有弊宇世傳致遠堂堂之下有新構一架極高其下可達五丈旌寺僧以此欲安織成千佛之象也寺屋之廢而僧不居處者多數百架東廊有石佛五百軀逐軀各異其形怪不可狀還就住持之舍披寺之故有白楮紙連三幅搗鍊精勁如今之咨文紙其一署國王王楷即仁宗諱也其二署高麗國王王王暉即毅宗諱也乃正至起居於大鑑師狀也其三書大德而一書皇統大德則蒙古成宗之年也考其時不合不可詳皇統則金太宗年也仁毅父子既稟

夷狄之正朔又致勤於禪佛如是而仁宗困於李
資謙毅宗未免巨濟之厄佞佛之無益於人國家
如此夫又有蠹餘青綾書字體類右軍勢如驚鴻
不可得而附翼奇矣哉有黃絹書者紫羅書者其
字畫下於青綾書而皆斷簡其文亦不可詳矣又
有六部合署朱勅一通如今之告身而亦逸其半
然亦好古者之所欲觀也伯勗足蘭憚於登陟遂
留一日有釋談上人者可語薄暮晉牧慶公太素
遣兩伶各執其業以娛山行又遣貢生金仲敦以
奉筆硯黎明細雨絲絲裊笠以行伶執笙笛先路

而釋該為鄉導出洞回望則水抱山圍宅幽而勢
阻真隱者之所盤旋也惜其為縹流之場而不與
高士為地也西行十里涉一巨川乃薩川之下流
也由川而南斜轉而西約行二十里皆頭流之麓
也野闊山低清川白石皆可樂也折而東向行澗
谷閒水清石斷斷然又折而北行九涉一澗又東
折而南行渡一板橋樹木蓊鬱仰不見天路漸高行
六七里有二鴨脚樹對立大百圍高參天入門有
古碣石額曰五臺山水陸精社記讀之殊覺好文
卒業則乃高麗權學士適趙宋紹興年中撰也寺

有樓觀甚偉間架甚多幡幢交雜有古佛僧言高
麗仁宗所鑄仁宗所御鐵如意亦在云日暮雨濕
遂止宿詰朝寺僧以芒鞋為贈出洞而北右山左
水途甚懸危行樹陰中十里許洞口稍開豁有廬
原可以耕而食又十里有居民採木為業鍛鉄為
生予曰花開為春葉落為秋有是夫從僧曰地僻
而里正無忌憚民苦於賦煩役重久矣出五里抵
默契寺寺在頭流最名勝刹而及寓目殊不愜前
聞但寺宇明媚以間金哥錦青紅雜製以為佛袈
裟居僧十餘默言精進如金臺而已少憩舍馬扶

筇披苦竹林迷失道間關抵坐方寺居僧只三四
寺前栗樹皆為斧斤斫倒問僧胡然僧曰民有欲
田之者禁亦不能予嘆曰太山長谷耕墾亦及國
家民旣庶矣當思所以富而教之也少坐呼笙笛
吹破湮鬱有鷄衣一衲班舞於庭蹲蹲然其氣像
可掬遂與之俱登前峴有木橫道坐其上前後臨
大壑晚色蒼然笙聲和笛寥亮清徹山鳴谷應神
魂覺爽矣興盡乃下坐溪邊盤石濯足是日猶陰
遂宿東上元寺夜半夢覺星月皎潔杜宇亂啼魂
清無寐吾庶兄金亨從喜報曰明日天王峯可快

意登覽也早戒行李遲明偪屨者綦致其鞏固行
林薄中路甚梗樛翳沒身其下皆苦竹笋芽出地
而茁亂蹴而行蛇虺當道木之自仆者相錯於前
皆梗楠豫章之材也或偃偻出其下或蹙躐行其
上仍思其不遇於匠石不見備於棟樑之用而枯
死空山為造物可惜然亦終其天年者歟予健步
先待於一澗石伯勗力縋腰繫一索使一僧挽而
前予迎謂曰僧從何處拘罪人來伯勗笑曰不過
山靈拿逋客耳蓋伯勗曾遊此山故戲荅云耳到
此渴甚從者皆掬水和糜飲之更無蹊逕只千丈

巖溜聚成一澗從山上而注如銀潢自天倒瀉澗
中巨石累累相疊為梁苔痕滑潤履之易路童行
往來者累小石其上以識其路樹陰參天光景不
漏如此泝澗五步一息十步一息矻矻用力澗盡
稍北復披苦竹中山皆石也攀緣磴葛轉轉以上
喘喘十餘里陟一崔嵬躑躅花爛開甚其別造化
折簪一花分命從者皆挿而行遇一巘崿號世尊
巖巖極峻拔有梯可上上而望天王峯可數十里
喜謂從者努力更進一步自此路稍低行五里許
到法界寺只留一僧木葉田田纔長山花艷艷方

開即候暮春也少憩即上有石如舩或如門由之
以行磐回曲折嵌磴礧礧捫石角攬木根纔及峯
頭而大霧四塞咫尺不辨香積僧將錡子來得一
寬地面巖溜淙淙滴成泉水不敢更上即命浙米
而炊滿山更無他材有木如杉檜僧云枇杷也薪
而爨失飯味試之果然古人知勞薪之所炊者因
可推也人傳頭流多柿栗海松秋風實落填滿磧
谷居僧取以充飢者妄也他草木尚不遂其生况
於果實乎每歲官督海松民常轉貿於產鄉以充
貢云凡事耳聞不如眼見者類此薄暮上峯頂頂

上有石壘僅容一間板屋屋下有石婦人像所謂
天王也紙錢亂掛屋樑有嵩善金宗直季鼎高陽
俞好仁克己夏山曹偉大虛成化壬辰中秋日同
登若干字歷觀曾遊人姓名多當世之傑也遂宿
祠宇襲重絛加煖衾以自溫從者燎火祠前以御
寒夜半天地開霽大野洪厓白雲宿於山谷如滄
海潮上多少浦口白浪驅雪而山之露者如島嶼
點點然也倚壘俯仰懷然神心俱凜身在鴻濛大
初之上而襟懷與天地同流矣辛亥黎明觀日出
賜谷晴空磨銅徘徊四望萬里極目大地群山皆

為蟻封蚯垤描寫則可會昌黎南山之作而心眼則直符宣尼東山之登矣多少興懷下瞰塵寰感慨係之矣山之東南古新羅之區也山之西北古百濟之地也紛紛蚊蚋起滅於甕盎從頭屈指幾多豪傑埋骨於此哉吾輩今日登覽無恙者亦豈非上之賜也茫茫靄靄大平烟火中又念有悲歡憂喜吹萬不齊者遂語伯勗曰安得與君邀倥傯之輩凌鵠鵠之飛身遊八紘之外眼窮一元之數以觀夫氣盡之時耶伯勗笑曰不可得矣仍命僕夫具二簋洞酌將報事於祠下其文曰昔先王制

上下之分五岳四瀆唯天子得以祭之諸侯只祭封內之山川公卿大夫各有所當祀也降及後世名山大川至於祠廟凡文人行子之出其下者必以行具而奠有告焉有所祈焉者皆是也維頭流邈在海邦磅礴數百里作鎮湖嶺二南之界環其下數十州必有巨靈高神興雲雨儲精英以福于民無窮已也某與進士鄭汝昌守道疾邪平生不讀非聖之書行過滌祀必礮之毀之而後止也今年夏作意遊山行及茲山之麓霞雨冥濛懼不克縱觀茲山之異也昨者雲陰解駁日光霽精心默

衡山之靈未必不享於韓愈氏也問諸居民以
神為摩耶夫人者誣而佔畢金公吾東方之博通
宏儒徵諸李承休之帝王韻記以神為麗祖之妃
威肅王后者信也提甲烈祖以一三韓免東人於
紛爭之苦立祠巨岳而永享于民順也吾年弱冠
失所怙老母在堂西山之暉漸迫愛日之懇未嘗
弛於跬步之頃也周文九齡郭琮祈年書籍有驗
敢為山行告焉而敢為老母祈焉白飯一盂明水
一爵貴其潔且敬也尚饗文旣成且酌伯勗曰世
方以為摩耶夫人而子明其威肅王后恐未免世

人之疑不如己之予曰且除威肅摩耶而山靈可
酹伯勗曰曾謂太山不如林放乎且國家行香不
於山靈而每於聖母或迦葉子將柰何予曰然則
頭流之靈不享矣棄山鎮而瀆滛祀是則秩宗者
之過也遂止平日但仰見雲氣之麗于天不知其
為半空物也到此則眼底平鋪而已平鋪處必晝
陰也日晡時嵐氣四合遂下由石門投香積寺寺
僧相賀云老物住此久今年多少僧俗欲觀上峯
者輒為風雨雲陰所蔽無一見得頭流之全體昨
晚陰雨有微措大一登便光霽是亦異也予領之

寺前有巖斗絕名金剛臺登眺則眼前奇峯無數
白雲常繞之自法界至上峯至香積皆轉繞層崖
而行崖面皆石葦山皆疊石落葉昧於石眼而草
木之根因著而生枝條短折皆東南靡拳曲蒙茸
不能舒展枝葉上峯尤甚杜鵑花始開一花兩花
而未拆之藥滿枝正是二月初也僧云山上花葉
五月始盛六月始彫予問伯勗峯高近天宜先得
陽氣而反後何也伯勗曰大地距天八萬里而吾
行數日而到上峯峯之高距地不滿百里則其距
天不知其幾也不可言先陽特孤高先受風耳予

曰凡物之生其忌高哉然高不免風雨之萃卑且
遭斧斤之厄將何擇而可乎香積傍有大木數百
章積焉問僧何為僧曰老子行乞於湖南諸州漕
致蟾津寸寸而輸欲新此寺已六年矣予曰吾儒
之於學宮其末矣釋氏之教覃自西域愚夫愚婦
奉之軼於文宣王民之耽邪不如信正之篤矣寺
可以望海予謂僧曰天壤之間水多而土少吾青
丘山多於地而國家生齒日煩無所容汝善慈悲
盍為衆生根尋頭流之所從來自長白山平鋤以
填南海作原隰萬里以奠民居為福田不猶愈於

精衛乎僧曰不敢當予又曰高岸為谷滄海為桑
田雲山石室修煉金丹舍爾涅槃之道學彼長生
之術待頭流為谷南海為桑田然後共保耆壽何
如僧曰願結因緣遂拍手大噱十四日壬子宿靈
神前有唱佛臺後有坐高臺突起千仞登而目可
及遠東有靈溪注於剖竹之中西有玉清水僧云
鷹所飲也北有石迦葉像堂中有畫迦葉面贊匪
懈堂三絕也烟煤雨淋惜其奇寶之見棄於空山
欲取之伯勗曰私於一家曷若公於名山以備具
眼者之遊賞也遂不取百姓施財邀福於迦葉與

天王筭夜宿法堂昏霧顛風敲戶排窓氣襲人甚
惡不可得而久留也五日癸丑並山脊而西脊以
北咸陽之地也而以南晉陽之地也一帶樵徑中
分咸晉彷徨眺望久之復行樹陰中然皆上山有
路可尋捕鷹者多成蹊徑不如上元法界路之甚
也自山頂猝下午投義神寺寺在平地寺壁有金
彥辛金楣題名居僧三十餘亦精進竹林柿園種
菜為食始覺人間世矣然回首青山已抱辭霞烟
謝猿鶴之懷矣寮主法海可僧也少憇遂行厭於
登高乃沿澗水踏白石而下洞府清邃可樂或拄

杖觀游魚及到神興寺寺前澄潭磐石可以永久
寺臨澗而構最勝於諸剎遊人足以忘歸矣昏投
寺中云此作法道場鍾鼓喧聒人物鬧擾茫然若
有所失是日約行四十餘里山路險阨寺僧皆以
為健步健步云予平日見郵童走卒行及奔馬自
以為事之甚難比山行初若重步為日多而兩脚
漸覺軒舉始知凡事在乎習成耳予每拄雙筇而
行二十六日甲寅始舍筇騎馬有雲中興了長老
二僧相送出洞至一略約了長老云近世有退隱
師者住神興一日語其徒曰有客至當淨掃除以

候俄而有一人騎白駒結藤蘿為鞅轡疾行而來履獨木如平地衆皆駭之至寺迎入一室清夜共話不可聽記明朝辭去有姜家蒼頭者學書於寺疑其異各執鞅以奉之其人以鞭揮去袖落一卷文字蒼頭急取之其人曰誤被塵隸攬取珍重慎藏勿以示世言訖急行復由略約而逝姜蒼頭者今白頭猶居晉陽之境人有知者求觀不與蓋其人崔孤雲不死在青鶴洞云其說雖無稽向亦可記也予與伯勗試度其橋纔進數步而惘恍欲墮返而厲揭於澗之下流以渡行出谷口山多簣簣

水橫洞下淥漸見村落西山之麓有古壘云古花
開也行五里亂澗水水石齒齒東行一里雙溪合
流兩石對立刻雙磳石門四字視廣濟岳門字加
大如斗而字體不相類如兒童習字者之為由石
門一里有龜龍古碑篆其額曰雙溪寺故真鑑禪
師碑九字傍書前西國都巡官承務郎侍御史內
供奉賜紫金魚袋臣崔致遠奉教撰乃光啓三年
建光啓唐僖宗年也甲子至今六百餘年亦古矣
人物存亡大運興廢相尋於無窮而此頑然者獨
立不朽可發一嘆所見碑碣多矣斷俗神行之碑

在於元和則先於光啓矣五臺水精之記撰於權
適則亦一世之文士也而獨於此興懷不已者豈
孤雲手澤尚存而孤雲所以徜徉山水間者其襟
懷有契於百世之後歟使某生於孤雲之時當執
杖屨而從不使孤雲踽踽與學佛者為徒使孤雲
生於今日亦必居可為之地摘華國之文賁飾大
平某亦得以奉筆硯於門下矣摩挲苔蘚多小憾
慨第讀其詞偶儷而好為禪佛作文何耶豈學於
晚唐而未變其習耶將仙逸隱淪玩世之衰而與
時偃昂托於禪佛以自韜晦耶不可知也碑此數

十步有百圍老槐根跨溪水亦孤雲手植寺僧燒
園誤延槐腹虎倒龍顛之餘幹之腐而存者文餘
居僧猶履根上往來呼為金橋噫植物亦有生氣
則不能如石之壽也寺北有孤雲所登八詠樓遺
址居僧義空欲鳩材而起樓云方與義空少坐忽
有剥啄聲問之云官捕銀鯽水漲不可施罟當取
川椒皮葉毒魚趣寺僧取給僧曰資殺生之物奈
何予亦顰蹙久之五臺之民旣不免里正之暴雙
磯僧又將供毒魚之物山林亦不安矣翌日乙卯
因雨輟行二十八日丙辰緣雙溪之東復扶筇攀

石磴側危棧行數里得一洞府稍寬平可耕世以此為青鶴洞云者也仍思吾輩得以至此則李眉叟何以不能到歟豈眉叟到此而謾不省記歟抑果無青鶴洞者而世傳相仍歟前行數十步臨絕壑閃過棧道得一菴曰佛日構在絕壁上前臨無地四山竒峭爽槩無比東西有香爐峯左右相對下有龍湫鶴淵深不可測菴僧云每歲季夏有青身赤頂長脰之禽集香爐峯松樹飛而下飲於湫即去居僧度度見之是青鶴云也安得羅而致之置一琴為伴耶菴之東有飛泉濺雪下落千丈入

鶴湫此儘佳境自登龜至此前後十六日所歷千
岩競秀萬壑爭流可喜可愕者不可一二數而可
人意者佛日一菴耳又聞鶴語疑眉叟所覓者在
此然壑谷峻絕非猿狖則不可行妻孥牛犢無所
容矣嚴川斷俗皆為緇塲而青鶴洞終不可得奈
何伯勗曰松與竹兩美也而不若此君風與月雙
清也而不若天心對影之為奇山與水俱仁智所
樂也而不若水哉水哉遲明將與子行出岳陽城
而觀瀾於大湖也予曰諾

金骨山錄

李胃

金骨山在珍島郡治西二十里中岳峻岌四面皆
石望之若玉芙蓉西北抵海坤支蜿蜒南驚可二
里而為艮岫又東可二里而為龍莊山至碧波渡
而止山之周圍凡三十餘里下有太伽藍古基曰
海院寺有石塔九層塔西有廢井上有三窟其最
下者曰西窟窟在山之西麓創始不知何代近有
僧一行造香木塑像十六羅漢安其窟窟之傍別
有古刹六七楹緇徒居之其最上者上窟窟在中
岳絕頂之東仄崖絕壁不可以仞猿猱之捷尚不
能度自東無有攀緣者足地由西窟而東上路極

危險緣崖轉石寸寸而前可一里石峯斗起不可
飛度累石為層梯者十三級下視無底心目俱眩
上此則為絕頂自絕頂迤東而下可三十步鑿顛
岩為凹而黏足上下者十二凹下此十餘步為上
窟又其北岩行數步又鑿顛崖憑虛架空向東直
下者八九步而為東窟前楹廚舍皆為風雨頽圯
窟北崖斷成彌勒佛古郡守柳好池所創僧家相
傳此山古多神驗每年能放光示異疫厲澇旱凡
有所禱必應自斷彌勒成而山無復放光彼柳也
若非外道金同者流必是壓山鬼入其言厖幻亦


足可聽歲戊午秋胄以罪謫來島上其冬遍觀此
山得所謂三窟者心記之越四年壬戌秋九月冊
封王世子是日大赦國中獨戊午一時被罪縉紳
之士不在原例余私自訟曰士君子生斯世必以
忠孝自期今我罪惡深重為聖朝棄物欲為臣而
不得忠於君欲為子而不得孝於親有兄弟朋友
妻子而又不待兄弟朋友妻子之樂吾非人類也
忽忽益無人世意一日佩童子一盃酒踽踽然行
投西窟携衲子彥顯智純直抵上窟窟併佛殿齋
廚總二閒空曠年多無有活僧落葉填門塵沙滿

則將不自今而作古歟兩所唯唯併錄隨目所得
若十篇遂書為金骨錄以遺西窟云在山凡二十
三日也時弘治壬戌冬十月鐵城李胄之錄

續東文選卷之二十一

山曾鄉社以雲無極

之聲豈限不孝之大也吉嗣於路意所附附平山
吾集今又吾長靈而不吟劍萬年十地心發於世
廷恩鄉社不吟於金之劍於此彼亦且不吟於



東坡